



'Omicron' putetba linüktem nungi tayimtsü nokdangtsüla: Kejriwal

Halsey nem 'Innovation Award' agütsütsü



Kisama nung Ao Morung yangluogo



Metsubo Jamir-i Heritage Village, Kisama nung tawa tasen yangluba Ao Morung lapoktsüdang jembiba noksa nung angur.

Dimapur, November 27, 2021 (TYO): Hokolbarnü Rural Development Minister, Metsubo Jamir-i Heritage Village, Kisama nung tawa tasen yangluba Ao Morung lapoktsüogo.

Hopta ka tsüingda Arju yanglutetba atema construction committee nung züngsem ajak dang kanga pelar, ta Metsubo Jamir-i ashi.

Iba sentong nung Advisor Dr. Nicky Kire-ia o tatsüka jembidang Aortemi meranga

inyakba aser mapang tatsüka tsüingda Morung renemba atema tenüngsang agütsü.

Sentong nungsa Ao Senden Tir, Kohima Ao Officers Telongjem (KAOT), Kohima Ao Telongjem (KAT), Watsü Union Kohima nungi lennirtemi o jembi.

Heritage Village, Kisama nung Aor Arju lapokba sentong nung Minister Tongpang Ozükum, Advisor Imnatiba aser 14 Tribes of Nagaland tirtem aden.

ANCSU-i tatidang dak sendakba onüktem lemsateper

Dimapur, November 27, 2021 (TYO): All Nagaland College Students' Union (ANCSU)-i Nagaland University dang tatidang anogotem reprangshimtsü, kaketshirtemi temelaba magii lungkak aitba aser police-i tashiyim inyakba indang onüktem sangdong ka nung lemsatepogo.

Tatidang anogotem tsüingda sodi mali anungji Nagaland University-i date-sheet meyipa reprangshitsüla aser kaketshirtem asoshi syllabus reprangshimang ta Media Cell, ANCSU-i sangdong ka nung ashi.

Külen, kaketshirtemi ANCSU

nungi temelaba magii tim mesüi lungkak aitba aitsür. College ketdangsurtem aser college units-i iba mesükba sentong nung kaketshirtem shilem magidaktsütsüla ta parnokisa ashi.

Maneni, police-i uniform agiba kaketshirtem dak tashiyim mapa inyakba aitsür aser oziüngi melaba ama iba mapa inyakertem merenshitsu akhangar ta ANCSU-isa metetdaktsüogo.

ANCSU-isa nisungtem dang kaketshirtemi lungkak aitba indang video aser noksatem mebelenshi mepishiogo.

RRM Ajay Bhatt-i Nagaland semdang



Dimapur, November 27, 2021 (TYO): Honibarnü Raksha Rajya Mantri, Ajay Bhatt Dimapur tonga aruogo aser pa anogo ana amongtsü.

Tanü Rangapahar Military Station nung ketdangsurtemi RRM Ajay Bhatt dang Northern arrtsülen aser North East state tem nung mapa inyakba osang

lemsatep. RRM Ajay Bhatt-isa Rangapahar War Memorial semdanga taküm bendanga agütsür nem tetushi agüja liasü.

RRM-i anogo ananü amongdang Dimapur aser Kohima semdangtsü aser tongtipang lennirtem den ajuruteptsü sentong lir.

COVID-19 variant tamajungba ka putet; Omicron ta ajar

November 27, 2021 (Agencies): World Health Organization (WHO)-i November 26 nü B.1.1.529 ya "variant of concern" ta züngokogo aser Omicron ta tenüng jaloktsüogo.

COVID-19 indang B.1.1.529 strain ya mezüng Africa anüdoklen puteta liasü.

WHO-i Omicron ya COVID-19 variant tamajungtibatem shilem nung züngokogo aser iba Delta, Alpha, Beta aser Gamma dena lir.

Omicron menatepba noktangtsü atema linük balalai November 26 nungi international flights noktangogo aser stock

markets o totzü jenjang ajemogo.

"COVID-19 nung temelenshi tamajung aliba kuli bushitetba nung ajemdaker WHO-i B.1.1.529 ya variant of concern (VOC) ta züngokogo aser Omicron jaloktsüogo" ta U.N. health agency-i sangdong ka nung metetdaktsü.

Omicron jungjunga metettsü atema hopta aika agia bushiteptsü akok ta parnokisa ashi.

Delhi sorkar den Covid atema yaritepa inyaker aser Institute of Liver and Biliary Sciences (ILBS) mendenbuba Dr SK Sarin-i Junge 2022 tashi ita trok atema kümdangtsü metetdaktsüogo.

Delhi Chief Minister Arvind Kejriwal-i Prime Minister Narendra Modi dang tanga linüktem nungi tayimtsü aruba noktangtsü ayongzükba anogo ka nung Dr SK Sarin-ia iba osang ashi.

Iba COVID variant ya Brihsotibarnü South Africa nung scientist temi metetdaktsü aser Israel and Belgium. Germany, Botswana, Hong Kong linüktem nunga putetogo.

Ano külen, Nephron Clinic Chairman, Dr. Sanjeev Bagai-ibo "Covid B.1.1.529 variant ya Delta variant dang nungi 500 ben agi tezübaba menateper" ta metetdaktsüogo.

Pre-paid meter ajanga sen tajungba angur: Minister Kronu

Kohima, November 27, 2021 (TYO): Power department-i pre-paid meters enokba sülen sen saruba inyakym tajungba kümogo ta Planning & Coordination, Land Revenue and Parliamentary Affairs Minister Neiba Kronu-i ashi.

"Nagaland-i kümshia Rs 440 Crore endokba power alir. Iba ya asenok ama state tila ka atema sen aika lir aser asenoki teti dangbo power malietsü" ta pai ashi.

"Power Department-i pre-paid billing system tenzükogo aser taoba küm ka tsüingda Rs 18 crore teimba sarutetogo. Tan

financial year nung Rs 50 crore teimba sarutsü imlar" ta Kronu-isa ashi.

Tizu Valley Hydro Power Project atema state screening committee nungi osang atar, ta paisa ashi.

"Department-i Tizu valley project ya EAP ajanga sen agüja state-i inyakba mapatong ka kümdaktsünür. Iba ajanga state ajangzüksü aser tangalen nungi power alizüktsüba ajemtsü" ta Minister Kronu-isa metetdaktsü.

Iba mapatong atema tetsükdaktsü kar liasü saka sorkari tiyongtsü aiba ajanga

Chakhesang Public Organisation aser Chakhesang Youth Front teloktem den ken o angatettepogo aser yimtsüngtemi No Objection Certificate agütsüogo, ta paisa ashi.

Tizu valley project dak alia ano Tizu ayong nung power mapatong ana lir- Lower Tizu (42 MW capacity) aser Zungki (24 MW capacity), ta Kronu-isa metetdaktsü.

Chief Minister Neiphiu Rio-i Dikhu HEP 186 MW project indang khuret koktetsü nangzükba atema pelar, ta paisa ashi.

Opposition maliba sorkar dak lendong lir: The Naga Rising

Dimapur, November 27, 2021 (TYO): Opposition maliba sorkar ka dak tashi ajak lir aser tashi ajak aliba ajanga ochimashi adokdaktsür, ta The Naga Rising-i metetdaktsüogo.

Nagaland nung opposition maliba sorkar aliba ajanga Chief Minister Neiphiu Rio-i Assembly nung tongtipang money bills aika benokba ajaki agizükogo. Item money bills ajanga sorkari public sen crore aika amshitsü tashi agütsür, ta parnoki ashi.

Democracy inyakym nung item money bill tem benokba sülen timi o atsüteper ang vote agitepa agizükur. Ajisüaka, Nov 25-26 anogotem ghonda ishika atema Nagaland Assembly agiogo aser iba ya Nagaland nung Assembly tatsütiba agiba asütsü, ta The Naga Rising-isa metetdaktsü.

Assembly nung Opposition maliba ajanga tanga Nagaland sorkar dak tashi ajak lir aser iba ajanga ochimashi maneni

adoktsü. Nagaland nung sen tashi amshiba inyakym ka tenzükogo aser ochimashi agi süngogo. Sen tashi ajanga nübertem tashi aser ola samatsüogo, ta parnokisa ashi.

Ajisüaka, tatem nungbo ochi indang tashi adoktsü aser Naga nunger joko mashioktetsü. Asenoki longjemer Nagaland yanglushitsü mapang ka tongogo anungji movement nung shilem agiang, ta The Naga Rising-isa metetdaktsüogo.

COVID-19 Nagaland: 4 dak putet & 4 taneptsü angu

Kohima, November 27, 2021 (TYO): Nagaland nung Honibarnü nisung 4 dak COVID-19 putet aser ano nisung 4 taneptsü angu.

"Tanü Dimapur nung nisung pezü dak putet" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Taoba ghonda 24 tsüingda COVID-19 agi shiranger nisung 4 taneptsü angu. Parnokji Mokokchung nung 2 aser Dimapur o Wokha nung kaka

(1) lir" ta paisa ashi.

Nisung 32,100 nungi 30,207 taneptsü nguogo aser ibaji taneptsü angur 94.10% lir ta paisa shisem.

Tang nisung 135 anepaludar saka parnok 104 dakbo shirangba yimya kecha mali, ta Dr Kikon-isa metetdaktsü.

Hokolbar tashi nung nisung 733,437 nem COVID-19 vaccine indang dose 12,76,090 agütsüogo, ta State Immunization Officer, Dr Ritu Thurr-ia ashi.

"Vaccine agirtemji frontline workers 60,979, healthcare workers 15,999, arishi küm 45 ser temapur 207,634 aser arishi küm 18 nungi 44 tsüingda alir 448,825 lir" ta paisa shisem.

"Vaccine agirtem rongnungi nisung 542,653-i dose anaprong agiogo. Parnokji frontline workers 48,457, healthcare workers 13,508, arishi küm 45 ser temapur 171,594 aser arishi küm 18 nungi 44 tsüingda alir 309,094 lir" ta Dr Thurr-isa metetdaktsü.

MLA Imkong L Imchen-i Khensa lushi nung 'Ajen Pok Link Road' lapoktsü



MLA Imkong L Imcheni Ajen Pok Link Road lapokba tamaitüsü lungzüng ka azüngtsüdüng tangokba noksa nung angur. Mokokchung, 27th November, 2021

Mokokchung, 27 Nov (TYO): Nov 27 nü 28 Koridang MLA, Imkong L Imchen-i 'Ajen Pok Link Road' ta sür lenmang tasen ka lapoktsüogo. Iba lenmang ya Khensa yim süngküm (NH-702D) anasa nungi aibabaji Meküli yim lenjem nungto pongteta adoker. Lenmangji kilometer 5.300 shi lir.

Iba lenmang ya Koridang Assembly Constituency 'LADP Iconic Project' kübok yangluba mapatong ka lir. Iba mapa ya May 13, 2021 nung tenzüka yanglu aser Nov 9, 2021 nü

tembang. Iba lenmang ajanga talisa Khensa nung lenmang aisü nung tajangzük aser terenlok angutsü imlar.

'Ajen Pok Link Road' lapokba tamaitüsü lungzüng ka MLA Imkong L Imchen-i azüngtsüogo aser ibaji meshiteta Khensa Baptist Arogo Pastor, Rev. K. Temjeni sarasadem.

Iba lenmang yanglutsüba ya Khensa Senso Mungdang 2020 küm platinum Jubilee amungba mapang lemtetba bangzüng kar renemba rongnung ka lir.

Iba sentong nung Khensa

Senso Mungdang tatong tir – Temsüchizüng, Khensa Village Council Chairman – Imtitoshi, Longritemsü Samen, Khensa Village Development Advisory Board nungi Dr. Watijungshi, Er. Imtisungzuk, Survey Committee nungi – Nengshirembe, Yimyu Baptist Arogo Pastor – Puryapang, Assoc. Pastor – Arentsaba parnoki shilem balala agia liasü.

Sentong nung Khensa, Meküli aser Mangmetong putu yimsüsürtemianir Yimyu ward yimden aser telok balala nungi lenirtem densema liasü.

NVCO-i ayonga Indian Constitution Day mungogo

Dimapur, Yimpoksüi/ November 27 (TYO): Linük ajunga den külemi Nagaland Voluntary Consumers Organisation (NVCO)-i ayongzüka November 26 nü state yimtiba Kohima nung Indian Constitution Day mungogo.

Indian Constitution Day ya 1949 küm November 29 nü Constituent Assembly of India-i Constitution of India adopt asüba nungtem nung amunger, koba 1950 küm January 26 nü benoka inyaksangshi tenzüka.

Kasa anogo ya Dr. Bhim Rao Ambedkar nem tetushi agütsüba anogo ka ama amunger, shibai Indian Constitution yangluba nung tongtibang shilem agi aser shiba dang father of the Indian Constitution ta ajar aser linük

ajungai pa ya India Constitution architect ama züngshir.

NVCO tir Kezhokhoto Savi-i ashiba agi, iba anogo ya nüburtem yongtsü nung Constitution jenjang ajungkettsü atema amunger. Constitution of India yagi India ya sovereign, secular, socialist, aser democratic republic ta sangdongogo aser lisopurtem nem equality, liberty, aser justice agütsütsü tenangzükba agütsüogo.

India indang Constitution ya 1946 aser 1949 küm December ita tsüngda draft asü. Linük nung tamangba yimsü dak sendakba nung mangatetep, cast tsüngda rara aser tetsür aser tebur tsüngda tetsüngda tulu ita lokti mesüngjemtetti aliba mapang ka nung yanglu.

Constitution nung

fundamental political codes, structure, inyakyim, tashi, sorkar institutions mapa, fundamental rights, directive principles aser lisopur-i sorkar atema aser külem lisopur atema timyaksü mapatem keta lir. India Constitution ya democracy tanüla, temulung aser len aniba tesangwa, anungji lisopur ajaki linük terenlok asoshi fundamental duties tem shidak benoka inyaksangshitsü atema tenangzükba agütsüla, ta Savi-i ashi.

Kaketshirtem nem Constitution indang preamble züngdaksütsü atema school ajak nung iba anogo amungtsü kanga tongtibang aser iba onük dak ajemdaker quiz aser otsünü zülutepba tetoktepba amala ayongzüka agütsüla, ta paisa ashi.

OSTD-i seminar ka ayongzüka agi



Ongpangkong Watsü Telungjem Dimapur-i sobaliba ken atenba mapang nung tangnokba noksa nung angur. (Dimapur, Nov. 27, 2021)

Dimapur, Yimpoksüi/ November 27 (TYO): 2022 küm February ita Hon Jubilee amungtsü aliba nung shilem ka ama Ongpangkong Senso Telungjem Dimapur-i Honibarnü IMC hall nung seminar ka ayongzüka agiogo.

Iba sentong nung Director, Symbios Creations Pvt Ltd, L Mongkum Jamir-i pei sasa zusenteta taküm litetba onük nung ajemdaker jembia liasü.

Taoba mapang NPSC & UPSC züngsem Wt. Dr. P Kilemsungla-i kin ka yanglushiba nung tetsür ka shilem nung jembia aser taoba Dimapur Govt College Principal, Wb. Akok Walling-i sobaliba aser yimtenren nung tamanger ka shilem onük nung ajemdaker jembia liasü.

Sentong nung Kr. Alesinla Longkumer (Ungma) 15th HSLC-2020, Imlikokla

Longkumer (Mokokchung) Top 15th HSLC 2020, Temjenienla Imchen, (Mangmetong) Top 13th HSLC 2020, Alikala Jamir, (Ungma) Top 9th HSSLC 2020 (Commerce), Imlisungla Pongen, (Longmisa) Top 1st HSSLC 2021 (Arts) aser Yimtiyong Longkumer, (Ungma) Top 7th 2021 (Arts) nung nem OSTD Academic Excellence Award agüja liasü.

Dimapur nung State Handloom Expo ayonger

Dimapur, Yimpoksüi/ November 27 (TYO): Nagaland Handloom & Handicrafts Development Corporation Ltd. Dimapur-i, December 7 nungi 20 tashi Urban Haat, Dimapur nung State Handloom Expo ka ayongzüka agütsü.

Iba sentong atema Office of the Development Commissioner (Handloom), Ministry of Textiles, Govt. of India, New Delhi-i senotsü teyari agütsütsü.

Handloom Expo nung shilem agütsü jangraba Co-operative Society, NGO, Apex Society aser SHG temi Project Cell, NHHDC Ltd, Half Nagarjan, Dimapur nung apply sütettsü. Expo nung

shilem agütsü atema apply asüba mapang shilem agütsüpurtem indang passport size photograph copy ka, address, Mobile Number, Bank A/C No with IFSC code tem December 4 nü mesera iba matong tsüngda office mapang agütsütsü nungdaker.

Sentong nung shilem agütsü jangrartermi osettsüt bener aruba jenjang asadanga sülen shilem agütsüpurtem shimtsü.

Stall ajak angati dang asütsü aser exhibitor/stall ajak nem Lumpsum daily allowances agütsütsü, ta Managing Director Zakabo V. Rotokha NCS-i sangdong ka ajanga metetdaksü.

Mkg nung electricity kümdanga amshitsü mepeshia metetdaksü

Dimapur, Yimpoksüi/ November 27 (TYO): Mokokchung electrical Division-i sangdong ka ajanga, Mokokchung district kübok aliba consumer ajak dang Mokokchung jila kübok kiyong ajak aser yimtsüng ajak nung public Distribution transformer tem overload asüba metetdaksüogo.

Anungji iba dak sendakba nung Division-i benjung mapang

electricity kanga kümdanga amshitsü aser decoration tem takokba tashi tajemba inoktsü mepeshia metetdaksüogo.

Division-isa, ajak nem kecha tetsükdaksü makai Power Supply agütsütsü atema consumer tem dang department den teka amteper inyaksü asoshi mepeshia metetdaksüogo, ta Electrical Division Mokokchung, Executive engineer-i sangdong ka ajanga metetdaksü.

Gari senzüsenpongtsü tetuyuba agütsü

Dimapur, Yimpoksüi/ November 27 (TYO): Sanuorü bridge adena 4 lane Arch Bridge ka yanglutsü aliba atema bendanga agütsü sentong agütsü lateter aliba dak sendakba nung nüburtem dang 29/11/2021 nü anepdang 6:00 ako nungi 10:00 ako tashi High School Junction nungi Sanuorü Bridge tashi lenmang shibanga ayutsü teletetba agiba sangdong ka

ajanga metetdaksüogo.

Senzüsenpongtertem dang atakzükja aliba mapang tsüngda Tinpatti Junction - D.B.S - Billy Graham road mesera New Secretariat leni High School junction - High Court Junction, Merima - N.B.C.C convention hall lenmang amshitsü mepeshia metetdaksür, ta PRO Kohima sangdong ka ajanga metetdaksü.

Kohima nung New India@75 awareness sentong agi



Modern college, Kohima nung November 26 nü HIV, TB aser Blood Donation campaign dak sendakba nung New India@75 awareness sentong tanabuba shilem agiba mapang tangokba noksa nung angur.

Dimapur, Yimpoksüi/ November 27 (TYO): HIV, TB aser Blood Donation campaign dak sendakba nung New India@75 awareness sentong phase tanabuba Kohima district kübok school trok aser college trok nung agiogo.

Awareness campaign ya November 26 nü Modern college, Kohima nung tatembangsa agiogo. Iba sentong nung shisalen agütsürtemi, Dr. Akaba Jamir DTO Kohima, Ainato Yeptho, Deputy Director NSACS & President VBDK aser Sentimongla Tzudir DPO DAPCU nung liasü.

HIV, Blood Donation & TB onük nung ajemdaker iba sentong nung shilem agiba school aser college tem nungi tetokteperitem atema tanabuba online tetoktepba ayongzüka agütsü. Iba tetoktepba

ya school jenjang nung; 'paint your thought' (mask painting/face painting) aser 'voice your thought' (spoken word competition) aser college jenjang nung; 'film your thought' (video competition) aser 'publicise your thought' (poster making competition) onüktem nung ajemdaker agütsü.

Iba tetoktepba nung shilem agütsü atema tenüng züngoksemtsü asoshi tatembangbuba anogoji November 30, 2021 nü asütsü. Tetoktepba nung shilem aginürtemi pei tenüng pei school aser college Headmaster/Principal tem nem agütsütettsü.

Iba sentong ya National AIDS Control Organisation, Ministry of HFW, GoI aser Kohima District tawabangba kübok Nagaland State AIDS Control Society-i achaayanga agidar.

Meghalaya nung drone ajanga mozü belener



Shillong, November 27, 2021 (Agencies): Meghalaya sorkari meta talang pilar aliba primary health centre tem dangi mozü belentsü atema drones amshir aser iba ya linük nung tang mezüing inyaker.

West Khasi Hills district kübok primary health centre dangi drones ajanga mozü belentsü.

"Tanü India nung mezüing atema Hybrid e-VTOL drone ajanga Medicine Delivery süogo. Meghalaya kübok Nongstoin nungi Maweit PHC tashi kilometre 25 tsüingda

minute 25 dang agi" ta Chief Minister Conrad Sangma-i ashi.

"Drone technology ajanga healthcare tarutsü melenshitsu. Iba ya mapatong balaka lir aser healthcare supply chain tajungba melenshitsu" ta pai ashi.

Tech Eagle, Smart Village Movement-i State Health department den yaritepa iba mapa inyaker. Mozü belentsü atema e-VTOL (Virtual take-off and landing) Drone AquilaX2 amshi, ta Conrad-isa metetdaksü.

"Northeast nung tenemtem

ajanga mesenzütetba tesemtem nung anüing ajanga senzübaji tajungtiba lir. Tanü TechEagle ajanga yangluba made in India Hybrid e-VTOL ajanga meta talang pilar alirtem yaritetba atema kanga pelar" ta TechEagle Founder & CEO, Vikram Singh Meena-i ashi.

"Onoki ghonda 4 senzüba lenmang nung minute 25 dang agiogo. e-VTOL drone technology ajanga alima nung meta talang pilar aliba tesemtem nung healthcare tajungba kümdaktsüsü lenmang lir" ta Vikram-isa metetdaksü

Assam-Manipur arrtsülen IED anguba atema nisung 4 apu Guwahati, November 27, 2021 (Agencies): Assam kübok Cachar district nung police-i Improvised Explosive Device (IED) ka anguba dak sendakba nung nisung pezü puogo.

Iba ya Manipur arrtsü anasa lir aser police-i apurtem rongnung tetsür ka dena lir.

November 23 nü Lakhipur tesem nung Cachar district police-i IED ka angu.

"Iba dak sendakba nung tetsür ka dena nisung pezü puogo.

Parnok ya Manipur nung People's Liberation Army (PLA) atema inyaktürtem liasü" ta Cachar district SP Ramandeep Kaur-i ashi.

"Arishi küm 39 tain tetsürlaji Rakibul Nessa ta jangjaogo aser la ya Lakhipur kübok Joypur nung alir aser la ya PLA den yarieteper ka lir" ta SP Kaur-isa ashi.

Manipur ketdangsürtem amaktsü atema IED ji yutsü ta SP-isa metetdaksü.

Assam & Mizoram-i arrtsü atema luden tentetsü Guwahati, November 27, 2021 (Agencies): Assam aser Mizoram sorkartemi arrtsü ken o tem angatetteptsü atema ludentem shimtsü lemtetogo.

Hokolbarnü New Delhi nung Assam Chief Minister Himanta Biswa Sarma aser Mizoram Chief Minister Zoramthanga na senden amendang iba ya lemtet.

Iba senden nung Union Home Minister Amit Shah aden aser idangji Northeast state ana tsüingda arrtsü ken o tem timi angatetteptsü bangiemtep.

Chief Minister anati mapang shia ajurutepa olemteptsü lemtet.

"Mizoram Chief Minister Zoramthanga den külemi Union Home Minister Amit Shah den ajurutepogo. Onoki arrtsülen tensa süngjema ayutsü nangzükshitepogo" ta Assam CM Sarma-i metetdaksü.

New Delhi nung aliba Assam Bhavan nung Brihostibar nikongdang Chief Minister anaprong ajurutepa liasü.

Assam kübok Cachar, Hailakandi aser Karimganj district aseme Mizoram kübok Kolasib, Mamit aser Aizawl district asem den arrtsütepa lir.

Micro Food Processing Enterprises

Renloktsü atema Inyakyim balaka

"World market nung tokteptsü atema aser Aatmanirbhar Bharat Abhiyan nung teyariteper tashitait kümdaktsüsü atema ozü sorkari food processing dak sendakba enterprise tilatem nem loans aser technical teyaritem agütsür"

- Narendra Modi, Prime Minister

PMFME (Pradhan Mantri Formalisation of Micro food procession Enterprises) Scheme kübok micro food enterprises renloktsü atema onok portal www.pmfme.mofpi.gov.in nung online ajanga tenüing agüjang.

Lakh ana tema Micro Food Processing Enterprises scheme kübok tajangzük angutsü.

PMFME Scheme Tajangzüktem.

- 35%** Bank nung sen (Maximum Rs. 10 Lakh) apuba nung 35% subsidy angutsü.
- District indang ODOP product kübok industry tasen tasentem atema bank nungi Loan aser subsidy angutsü.
- Training aser technical teyari.

Sen aputsü aser bank nungi 35% subsidy angutsü atema tanü www.pmfme.mofpi.gov.in nung tenüing agüjang.

www.pmfme.mofpi.gov.in 01302382088 089

PMFME Weblink

To Know More Scan Now!

Cachar Police-i Pradip Dutta Roy apu

Guwahati, November 27, 2021 (Agencies): Barak Valley nung nübo Democratic Front indang ishiba kümogo" ta Sarma-i chief convenor Pradip Dutta-i Assamese oshi nung züluba hoarding melena Bengali oshi nung zülutsü ghonda 48 atakzüksü aser iba atema Cachar Police-i pa puogo.

Pradip Dutta Roy ya All Cachar Karimganj Hailakandi Students' Association (ACKHSA) indang founding president lir.

Hindu Yuva Parishad-i Silchar Sadar police station nung pa anema FIR ka benokba sülen pa apu.

Assam chief minister Himanta Biswa Sarma-i home department bena lir aser pai Dutta Roy aputsü tetuyuba agütsü ta osang angazüker.

"Pradip Dutta Roy ya Bengali nunger anema lir.

Bengali Hindu nunger Barak Valley nung nübo ishiba kümogo" ta Sarma-i ash.

November 24, 2021 nü Meherpur nung Cachar district administration-i Assamese oshi nung züluba hoarding ka ayu.

November 25, 2021 nü Pradip Dutta Roy-i ghonda 48 tsüingda iba hoarding agientsü tetuyuba agütsü.

November 27, 2021 nü district administration-i hoarding ji agien aser iba atema BJP-i aniba sorkar aitsü.

Honibarnep police-i Dutta Roy dang asüingdangya asü.

Assam water resources minister Pijush Hazarika-i Dutta Roy ya tekolok meshitak ta shiogo.

Ano telok balalai Dutta Roy aputsü atema takhanga agütsüogo.

Assam Rifles-i Rs 24.96 lakh alangba kozüjang apu



Aizawl, November 27, 2021 (Agencies): IGAR (East)-i sangdong ka Rifles sepaitemi Rs 24.96 lakh alangba kozüjang apu.

Champhai district kübok Ruantlang nung parnoki ozüing alema abenba kozüjang shibelenba ya tebilemtsü khuret tulu ka lir" ta Assam Rifles sangdong nungsa ashi.

"Mizoram nung aser talisa India-Myanmar arrtsülen ozüing alema kozüjang shibelenba ya tebilemtsü khuret tulu ka lir" ta Assam Rifles sangdong nungsa ashi.

"Rs 24,96,000 indang



TIR YIMYIM YIMOBILEM (EDITORIAL)

DIMAPUR AMUNGNÜ, YIMPOKSÜ (NOVEMBER) 28, 2021

Tanüla sempet agütsünüba

Asenok aikati asen taküm yabo kechasütsüa masü, tagidak maka, shinga nema kecha tajung magütsütetsü amai bilema alitsüa akok, ajisüaka asenoki asensasa asen taküm ya yamaji ilaa bilemtsüa masü, asen taküm ya tesüngmangtsü Tsüngrem ain tashi nung yanglua lir aser iba tashi ainji asenok dak keta lir ta Tenüngsang ken 139:14 nung shia angutsü. Aji oda, asenok ya mashi masü, kechiyong asenok shirnok den kong kechi inyaka lidir, parnok taküm dakji asen jakla yimya aser mapatem ajanga kongshir. Atangji, asenokibo asen taküm mapatem ajanga tangar dak kongshibaji memetetsüa akok, kechiyong tangar jungdaksütsü mesüra akoksadaksütsü asoshi bilema inyaker masü saka asena aseni angatetba nung lia aoer. Tenyar Paul-ibo Tsüngremi pa ajanga tangar tesama tia nung kümzüksü aser maotsütetsüa Tsüngremi pa nem tanüla sempettem agütsüba jangjajangjaa meteta liasü. Anungji, pai memetetba, manguba aser metongtetba purtema nem dena pa nem agütsüba tanüla sempettem lemsateptsü asoshi teti teyongyaba liasü. Paul dak iba ama Tsüngrem tenzüker, kuliser, sannüker aser kümzükba purtem dak akettsüba tanüla tarongba iasü. Pai Pa kümzükba Yisu Khrista temeim indang ashitsübaaji menaa melitet, tonga otetba tashi ao aser moutetba purtem dangi shiti zülua ajungshitep aser sarasademtsü. Paul-i talisa Rom nung alir Khristan-tem asoshi sarasademtsü aser parnok mapa nung pa kanga temulungsüa liasü, anungji pa Rom tashiji orr parnok nem tanüla sempet kar agütsünüba kanga yongyaa sarasademtsüba indang asenoki Rome tapu 1: 9-11 nung angur. Aji oda, Paul sarasadem ajanga Rom nung aliba Khristan-tem ajanga Yisu Khrista osang tajung alima ajaklen meteta aoba kuliji asenoki iba Lai tekong ajanga metetter. Iba amaji asen den lisemertem taküm nung dang masü saka asen malidak asen sarasadem ajanga tangar tak?m aser kibong aika nung Tsüngremi mapa inyakdagi ta asenoki bilemtsüa. Tenyar Paul-i Tsüngremi pa nem agütsüba tanüla sempettem tamangertem nem agütsünüba ama, asenokia asen nem Tsüngremi agütsüba temoatsü aser sempettemji asen kinunger, medemer, kidang kiyonger, külem inyakerter aser nübertem den lemsateptsü asoshi jangratsüla. " Ni arur nenok nem tanüla sempet agütsütsü asoshi kanga yongyar," ta Rom 1:11 nung tenyar Paul-i Rom nung alir tamangertem dangi züluba teyongyaba aser tejangraba tanülaji kodang asenok dak lidir, Paul ama kidang mena melitet kuli süa jajatsü. Ashiko, asenokibo tangar nungiang asen tanüla temoatsü angutsüang imlaa alitsüa akok, kechiyong aiben asenoki aseni kechi agütsütsü aser shirnok moatsütsü (?) ta bilemtsü melen, shibai asenok nem kechi agütsütsü aser shibai asenok moatsütsü (?) ta dang bilemer. Ajisüaka, kodang asenoki angutsüba temoatsütem indangang mebilemi, Paul ama, asenoki tangar nem agütsütsüba temoatsütem indangang bilema sarasademdir, idangjiang asenok taküm aser kibong ya tangar asoshi temoatsü kibong küma asenoki inyakba mapatem nung azükarutsü. Tsüngremi asenok nem agütsüba tanüla sempettem aika lir, itemji mapa ka junga inyaktetba, ken junga tentetba, o junga jembitetba, Tsüngrem o aser pongmang mangdang ratettetba, shinba, aneptsüba, sarasademba, temeim mapa inyaknüba, agütsünüba, sayutsü jangraba, kotaker oshi jembiba, tenzüka aser sayatenya mapa inyakbatem lir. Atangji, asenoki kechi tajung inyaktette, item ajakji Tsüngremi asenok nem tangar moatsütsü asoshi agütsüba tanüla sempettem asütsü. Item sempettemji asen kija agitsü atema masü saka tangar den lemsateptsü asoshi agütsüba lir. Item sempettem jagi asenoki anogo shia nisung ka taküm nungbosa kongshitsüa, Pauli yongyaba ama, asenokia yongyaseta inyakdi. Asenokbo tangar asen dangi maruba indang mebilemli saka asen aotsüba indang bilemli. Aji oda, tangar arua asen moatsübaaji masü saka asen orr tangar moatsübaaji Tsüngremibo züngshitsü. Iba jagiang, Yobi tangar atema sarasademtsü nung, pa nemang temoatsü tuluba agütsüba asenoki Yob 42:10 nung angur. Atangji, asen ajungtsü asoshi bilema masü saka tangar den Tsüngrem temeim aser temoatsü aser tanüla sempettem lemsatepnüba tejangraba aser tarongbaji asenok tamanger shia dak alitsü tim. Iba jagiang asenoka Yisu dak amangertema ta tangari metettsü.

OLEMSABANG

Tanü lokti temelenshi bener aruba nung pei- lokti jenjang reprangdangba (Introspection in bringing about a social change today)

S. Temjen Imchen, Jorhat, Assam

(Yashi adok nungi...)

Lanur-asensor rogo nungji tazüngertemji Graduate nungi tenzüker, post-graduate aser doctorate degree holder tem tesa lir. Parnokji secular teachers, laishir-rogo, arogo nung tenzüker, free-lance missionary aser evangelist-tem, theological educators, aser item mesükba nübertem. Item lanu-asensor telok dak aketba yimya tajung ainaka lir. Lanurtemji temulung aser shisatsüji teindang aser tesadem (straightforward and open-minded);parnok metet asen Ao kinji tashi-temetet, meranga inyakba aser yimlibilema aser taochi sayutetba kin ta bilemer; asen Ao kin ji telongjem aser terenlok nung aoba kin ta metet; asen nubor ji sobaliba nung kanga takang; pei-pur bendanger madak aser bendang lima nung mapa inyaker mesülitazünger asüyonga kanga keta sentepa-yaritepa liteper Kong lidir liang, lanurtemi longjema dang alir aser linur!Ano külen, kodangsa o-lemsapang nung atenshia o lemsatepdir, parnok timbakati shilem agir. Shisatokden mapang nung jembiba onuktem itemi lir Covid-wara indang; iba alima rangpen wara sülen kechi inyaksüla;clean-election campaign; Nagaland state nung ochimashi mapa inyakba (corruption);Ao Baptist Arogo Mungdang (ABAM)ji lokti aser sorkar yariba maparen; Arogo inyakyim; Baptist tamangba temzüng aser maparen; pastor aser co-pastor koma inyaker iba indang; pastor itasen; tangar aser aseni Tsüngremer tenyaba mapa koma inyaker, item onuktem benoka iba sabang nung sensaksem tajung akar. Aiben o jembirtemji theological educators tem asür. Ano secular professor temia jembir. Iba sabang nung o jembirji aiben international aser national level nung nungtoko laiputishir aser shisashirtem, aser voluntary organization/NGOs nung inyakertertemi jembidaksur.

Temalen agüja aliba onuktem jembidang, teti nung lanur tesayur aser tenzükertem yagi shilem agir aser shisatsü agutsutepa dang aoer. Lanuyim tesayur aser laiputishirtemji tashi temetet tajung nguteter alir aser tekaraburtem asünung, jet-jet ta dang (fast-thinking) onük ajakji angateta aoer jembir aser lenji oa dang sensaksem akar. Tasa (idea) kar bo tejen, karbo tasen benoka jembir. Discussion mapang nung lanurtem tsüngda obang-mapu kodanga madoker. Give-and-take yimya nung aoer lbaji yimya ji kanga tajung! Iba den külemi, tejbembiba onükji osangkaket (Newspaper) nung adokdakja aser social media balala nung prokshia ano tangar a züngdaksur. Iba osang prokshiba ajanga, aser Aor lokti, Ao Senden mesüra ABAM sabangtashi tonga tuatemelenshi indang jembiba metet pelateptsü junger ta bilemer. Intellectual telok ka - through any social media platform - nung kechi lemsateper iba indang metetpelaba aser tongtepratepbaji mapa tajung aser terenlok mapa!

Tainbor teloki o-lemsapang nung lokti temelenshi atema shilem agiba:

Social media platform (for e.g., WhatsApp) nung tainbor telok(seniorfolks) koba nung züngsem ainaka tena shilem agir, ibajia lokti temelenshi asoshi lir. Lokti nung takutsüngsenbener arutsü inyakba nung shilem agirtemji nisung kar secular teachers, bangdak yimsusur, laishirtem, arogo nung tenzüker journalist nubor tajung kar atenba, aser mapa nungi sodi (retired) agir alirtem jenti tena lir.Ni iba o lemsatepba ya group discussion koba social media sabang nung agir ibaji analytical approach tsütsü nungi angatetsü merangdi. Tejbembiba onük ajak nung item tainbor-i shisa tarok aser tajung agütsüyonga aoer, ibaji junger. Saka, parnok dak timtim kaji: jembiba dak alaka melenshitsu tasak!!! Temalen agüja aliba onük tajungtem ajak lockdown mapang nung anogo munga züngsem ainakati shilem agia lemsateper. Lanu-asensor memesuk, tainbor telok timba kati sabang nung anogo, hapta junga, aser ita piyong onük tajung aika jembiba aruaka, teloki kodang kechi inyaksüla (to suggest proposals) ta asüdang, parnok ishinakati practical nung nungbo meinyaktetsü ta shia noktanga (suppress) ayur Hau, atangji print media ajanga zülur aser osang kaket nung adoktsur aser azünger. Ibaji tatem asür Tangatetsu kaji ya: sabang nung jembidang teintet-rogotemi opang mapurjia adoker, ibaji shisatokder yimya. Saka, sensaksem telok nung tajiteta kaji ya - züngsem karibo lanu-asensor shisashirtemi ashiba o-jang kata mepaidoki dang langzur; pei metetbaji dang absolute truth; kum noklang ka tain lokti aser arogo tamang aser inyakyim ji dang noklang nung noklang shitak ta bilemer aser shioktsur; temetongshi o magizuker; aser item amala aika lir. Temelenshi indangbo jembir, saka asen taküm yimya aser lokti nung temelenshi atemabo meinyaktsu ta bilemba angur. Iba ama jakla aser mulungsentsu yabo melenshitsu. Ano timtim kaji, tainbori tanubortemi ashiba o magizukteter; tejakleni oya alirtemji sottsü meranger, mesüra tenuk meremer; akumtsubutep mali. Ken-kenbo, ajia adar tayang kübzükteper. Aya, yamai süra asenok koma alima dangi lokti nung takutsüngsen (social rejuvenation) bener arutsütsü ta bilemer! Ajak masü, nisung kar lir! Alima yanglushinüra, tangar o-a angatsüla tim alima yanglushinüra, temetongshi o agizüksüla. Iba o zulu ya group discussion koba agir ibaji analytical approach tsütsü nungi angatetsü merangogo.

Temalen lemsatepba onük nung ajemdaker, kü o-mulung ishika idaki lephsia agütsür. Lokti temelenshi bener arutsü merangba nung shilem agir ajak: teintetbor aser lanur-asensor shilem agitetsü lenmang aisu nung langur. Lokti temelenshi ka mesüra mapa tasen ka inyaktsu merangba nung ajak longjeme aotsüla! Iba nungji tarishitep agi masü teyimlatep, tesempatep masü tazüzüktep, telemsatep masü telongjem, tekirak mulungsentsü masü ochi mulungsentsu, asüküm masü ajemalu, sempatsü melena temeim mapa inyakba, itemjagi lokti tejakeni anir. Nukjidong tajung yur, tenla ki sabang (pulpit) nung dang masü (when the regular gatherings are temporarily suspended), saka tanü social media platform balala nung debate tajung akar aser iba sabang nungo-lemsatepba ajanga tanü alima tongpang tulujia kokteta bener otetsu! Iba nung nung telongjem, ochishi mulungsentsu, teyimlatep aser temeim mapa sayuteptsüla ta angateter.

Lokti teyanglushibanung mapa küma inyakbaren

Covid-19 wara mapang aser iba sülen asenok teinyaktsü mapa aika angur aser lenmangtema sadema lir.Lokti temelenshiindang lenmang aisu nung akabarongnung, ishika tuyutsü tenüngdaksü Tangari ngudaksütsü osang prokshibaji masü (not show-off news and activities),saka temelenshi aruyimji mapa tila kar inyakba ajanga tenzüker. Nisung ka dang-a ajangzukba mapajia kanga tongtipang Ano, taka-taiteribo mapa tulu atemzuka inyaktsu akok, rongsen tenlaba ajanga. Tangar dak temeim mapa agi tangshia inyaktsu senti mapangji tang ya lir. Lenmang pungusü nung bilemdangdi:

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Khristmas jeli sentong ka nung asürtem bilemteta sarasadem



Tawa Waukesha, Wisconsin nung Khristmas jeli sentong ka nung asürtem atema mangyimba sentong agidang tangokba noksa nung angur.

November 27, 2021: Tawa Waukesha, Wisconsin nung Khristmas jeli sentong ka nung gari kati nisung pongu tsüksetba den nisung 50 jungnüa yirutsüba sülen yimti nung sensotem, asür kinüngertem aser tembartem adenshia asürtem atema mangyima sarasademba sentong ka ayongzüka agiogo.

Taoba Amongnü aonung SUV gari kati Khristmas parade nung shilem agirtem pongu tsükset aser tanur 18 densema nisung 48 yiruja liasü.

Nisung noklang aika candle amer Cutler Park nung adenshia iba sentong nung shilem agi.

Iba sentong nung shilem agia o jembirtem rongnung Mayor, Shawn Reilly, Police Chief Thompson aser Fire Service

Chief, Steve Howard nung desema liasü.

Kasa sentong nungsa Khristan, Sikh, Muslim, Yihuda, Unitarian Universalist aser tanga yimsü balala nungi lenirtemi mangyimertem atema tesünep aser yirua alirtem atema taneptsüba meshia sarasademtsüogo.

Iba sentong ya Association of Waukesha Congregations-i ayongzüka aser Brookfield-Elm Grove Interfaith Network (BEGIN) o Interfaith Conference of Greater Milwaukee-ia shilem agi.

Asürtem bilemteta sarasademba sentong nung jembidang Waukesha School District nungi Amanda Medina Roddy-i, "Onok melung kanga

yirur. Onok kanga jashir. Onok mepelar," ta metetdaksü.

Iba tatalokba dak sendakba nung arrshi küm 39, Darrell Brooks pua lir aser metetsümonga nisung tepsetba atema pa anema ken o benokogo. Police-i ashiba agi, Darrell tesem ka nung raraba sülen ajenba mapang nung pai gari jagi lokti dak tsükoktsü.

1999 küm nungi tenzüka pa anema ken o 16 benoka liasü. Tan ita tetenzüklena pai par tanur tetsü dak menüng ta tai tonglokja apu saka bail nung chioker liasü. Tang tesüsa pa anema benokba ken o nung pa aitsüra pa taküm piyong tepuokdak ayutsü obendang agütsütsüa akok.

Iraq nung Khristantem nem Arogotemi teyari agütsür

Yimpoksu/November 26, 2021 (Agencies): 2017 küm Iraq nung sepaitem aser US-i aniba sepaitem Islamic State telungpurtem mindoka liasü, iba sülen Iraq nung Khristantem aser tamangba yimsü tsütsü nütsüng agi ajema aliba teloktem nem Catholic Arogotem aser tanga lokti tentetemi teyari agüja arudar.

"Islamic State-i nüburtem nem timtem tekangshi tulu agütsüogo. Parnok inyakyim agi nüburtem kanga mejungi kongshir aliba onoki tang tashi ajangshidar," ta Armenia nung Khristan Fadi-i ashi.

Irbil nungi Chaldean Catholic Archbishop Bashar Warda-i achaayanga school pezü, university ka aser mozüki ka yanglujia iba tesem nung aliba nüburtemi kanga nüngdaka aliba mapatem agütsüogo. Iba maparen atema Irbil indang Chaldean Archdiocese nung counsel, Stephen Rasche-i teyari agüja liasü.

"Tamangba yimsü ya azütokshi tenzüka tera ka mekümdaktsütsüla. Asen Tsüngrem ya asenok ajak asoshi lir. Pa sülen anidaker ka

ama asenoki iba ya jangjatsütsüla aser tangazükba len anitsüla," ta Archbishop Warda-i Catholic News Service dang ashi.

Islamic State telungpurtemi Iraq nung nütsüng agi ajema aliba tamangba yimsü teloktem meshi meshia samatsütsü merangba mapang Erbil nung Catholic University yagi 2015 küm mezüngbuba parnok indang kishi lapoktsü aser October ita mezüngbuba class graduate süogo. University vice chancellor Rasche-i, parnoki mezüngbuba business administration, IT, finance aser nungndakba course tem agütsüdar, ta metetdaksü.

Graduation sentong nung jembiba mapang Cardinal Louis Sako-i, "Catholic Arogotemi mezüngbuba Aso nungi tenzüka school, university, mozüki, sensaker nem teyari aser tanga teyari agütsüba maparen balala inyaka arudar," ta ashi.

Cardinal Sako, shiba Iraq indang Chaldean Catholic patriarch lir, pai tamangba yimsü dak sendakba nung kakat shisatsü ya Christian mesüra Muslim nungertem nem dang

masü saka tamangba yimsü balala amanger ajak nem agütsütsü imlar, yamaji asünung dang kakatshirtemi kasa onük angazüktsü aser kiralongra nungi jenbua alitsü, ta ashi.

Father Emanuel Youkhana, shibai Christian Aid Program Northern Iraq (CAPNI) achaayanger pai, par teloki Eastern Christianity dak sendakba nung tetuyuba agütsür, ta ashi.

"Iba ya Eastern Christian maitsü ken o ka lir, koba taoba küm 2,000 tashi Iraq dak yangloka lir. Onoki lenla ana nung rangloker inyakdar. Kaji catechism, Bible studies, liturgical courses, aser summer class tem ajanga Arogotem capacity building lir. Onoki Dahuk, Ankawa, Kirkuk, aser Ninevah Plain nung Arogo 24 dak tema anisemer inyakdar," ta pai CNS dang ashi.

"Onok ano Syriac ajungkettsütsü atema inyakdar, koba Eastern church tetsü oshi lir. Onok ket nung küm 2000 indang Syriac literature, theology aser archival material tem lir," ta Assyrian Church nungi Father Youkhana-i metetdaksü.

ANO GO ABEN TSÜNGREM DEN

TANANG ASER TASEN

"Yimjung anogo nung pelaa liang, aser tüokrong anogo nung bilemdangang: Tsüngremi kata kata yanglu, oda nisungi pa sülen kechi ataloktsüar mebushitetsüsa" (Sayu. 7:14).

Mapang ka nung koda ka sensaka alir palakaji tanelaren tashi taitba alir ta angateta liasü. Tang ibaji melenshir radio, television aser sayutsüngiba sabang ajak nung azükaruba dang jembir. Azükaruba indang sayutsüngiri talila oa sayutsüngir, "Na kümzüka lira anema alitsü aser rongsen akatsü!"

Anaprongla tali aobaji tai. Tsüngremi par chirtem junga aliba aser sensaka aliba tuozük shidak yutsür. Laishiba nung Tsüngrem nisung meshidakji ajangshia mali. Pauli ashi, "Sensaka alitsü aser peria alitsü aji ni metet. Kechisarena nung aser mapa ajak nung, sünga alitsüa aser yaa alitsüa, jenti kaa alitsüa aser anünga alitsüa, iba miim Oji ni angazükogo" (Fil. 4:12,13). Tsüngrem nisungi tia ajak nung temulung süa Tsüngrem Tenüng asangtsü angazüker. 3 Yohan 2 nung kaa alitsü sayu, "Temeimba, ne tanela koda renloker aji oda ajak nung na renloka aser anema alitsü ni sarasademer. Tanela nung kwika sünga lir ashitsü makok.

Tsüngremi asenok tanela junga alitsü dang moatsüra temangji koda asütsü. Timba mokokmin aser sensak tia nung dang alitsü! Tasen Lai nung taochi indang Pauli jemi saka pai temalen raratep aser telunglen tetsübu aliba indang zülü (2 Kor. 7:5). Lazar shibai kotaker temoatsü angu aser pa ali taküm nung nüngdak aser aya-tzüra liasü.

Tamangji asen nüngdak ajak angutsüba magic ka masü, mesüra sensak tia aser timtemji tamang nung tashi maitba tutetsüba ka masü. Ibri 11 nung tüzük shidak agütsüba sayur. Tamang ajanga parnoki agizükba aser tagütsübaa angu. Tamang ajanga azükaruba aser timtema angu. Tapu 11 ji junga zügang. Anüngdang koda alitsü mesüra aonung danga koda alitsü? (Lipok 1:5). Oh Tsüngrem, koda shisa taka!

Takümü Tsüngrem chirtemi ajangshia tepela aser tejashi agi yangluba ka lir. Saka asenoki teperi aser sünga aliba taküm ka kanera asenoki takoa aser tananga metetsüla! (H.S. Rice).

O Tsüngrem, Nai agütsüba takümi alima nung tajung aser tamajung onok taküm lenmang nung ajanga aodang Ne shisatsü angatetsü onok dang sayuang. Amen.

Pope Francis-i Lebanon nung dang longjema alitsü ayongzüka

November 27, 2021:

Brihostibarnü Pope Francis-i Lebanon Ato kilonser, Najib Mikati ajuru aser pai linük nüburtem dang linük kümzüksü atema longjema alitsü aser amalitepa alitsü ayongzüka.

Brihostibarnü Ato kilonser, Najib Mikati-i Vatican City semdang aser Pope Francis den minute 20 shi senden mena liasü.

Senden tembangba sülen Pope-i Lebanon nung dang "linük kümzüksü atema Lebanon nung ajaki amalitepa alitsüla," ta ayongzüka.

Tang Lebanon linük nung rongsenkettsüng jenjang majungba aser loktiliba nung petsaperong aliba mapang nung Ato kilonseri Pope ajuru.

Tang Lebanon nung nisung 10 shia nungi nisung 8 bo sensak tia nung lir aser tanur 700,000 shi shisaliok junga mangutsüsa jenjang ka nung lir, ta UNICEF-i metetdaksü.

"Lebanon ya linük ka lir, osang ka aser raratsü atema tenangzüka ka lir. Tsüngremi manguttsü atema ni sarasademtsür," ta Pope-i ashi.

"Lebanon tanaben asentenshir nokdaksü atema yariteptsü asoshi ni tanga linüktem den jembia inyaktsü, ta ni nangzüker," ta paisa ashi.

Taküm July ita nunga Pope Francis-i Lebanon nung Khristan lenir 10 ajuru linük tensa atema jembia liasü.

Beirut nung bomb lendong atalokba dak sendakba nung pai, ni Lebanon kanga semdangnüa liasü, o agi dang masü saka mapa agia iba linük yaritsüla, ta ayongzüka.

Ato kilonser, Mikati-i Pope nem Melkite Tenla ki raksaba nungi lungro ka agütsü. 2020 küm August ita nung Beirut nung bomb lendong atalokdang iba Tenla ki raksaa liasü. Iba lendong nung nisung 200 dak tema asü.

Yimtenren nung ochimashi aser mapang talangka mangatettep aliba ajanga iba linük asentenshia tanaben shia maruteter aser senso aika tejashi nung alir.

Mikati-isa Rome semdangba mapang nung France Tir, Pa teka nung Lebanon amer Emmanuel Macron-a ajurutsüa akok. Pai Egypt aser Turkey nata semdangtsü.

OLONG PAITEP # 6010

1		2		3		4	5			
				6						7
		8								
9				10		11				
			12					13		
						14				
16						17				

TIPIEN		LANGTSÜNGLEN	
1. Nisung jenti	- (5)	1. Tenük telong	- (9)
4. Tsük rudenba	- (5)	2. Committee dang ajar	- (5)
6. Temzüng tesashi	- (5)	3. Yagi ki okdoker	- (7)
8. S_ _ _ i	- (3)	5. Yim lenmang	- (5)
9. Nisung rongnung telemsa	- (3)	7. Temoatsü keter meyipa aruba	- (9)
10. Anogoshi	- (4)	11. Kanga junga menemba	- (7)
12. Ajanga aor	- (4)	12. Kenyongi majinü	- (5)
13. Tsük rizüngdak	- (3)	13. Rong kanga tulu	- (5)
14. Tebang nungi adokba	- (3)		
16. Süngdong tatembangtiba	- (5)		
17. Meputep	- (5)		

OLONG PAITEP # 6009 TELANGZÜBA

TIPIEN :	LANGTSÜNGLEN :
1. Tanga, 6. Wara, 7. Rajang,	2. Anga, 3. Yabang, 4. Tarok, 5. Orak,
9. Anük, 10. Jenjang, 11. Alar,	8. Ainer, 9. Anema, 10. Jabili,
14. Ngashi, 15. Nala, 16. Mechi.	11. Among, 12. Miim, 13. Anem.

KOMA SÜLA TELANGZÜBA

Q. Asen lima nung 'Clean Election' indang ya kenyongi mejembi aser meinyak nunga koma süla ?

Kangasa ajungtsü, kechiyong taoba election nunga clean election atema kanga meranga jembirtem tesashiba süa election agiba tenük kuli aika lir. Anungji atakatem talila mejaok tajungba ta bilemer

-WhatsApp

Tanü asen lima nung Clean Election atema jimbia inyakba ya kanga junger aser yamaji inyaksü tim ta angateter, aji saka ABAM küpok Arogotemi tashiyim amshia timtem aser adakatem jazüka minyaki parnoki anir tim lenmang nung tangatetba tajung agi kija aser lokdi ajak nem angatetdakja jajara ya ajanga kenübosa asen lima temelenshi tajung ka adoktsü ta angateter.

-T.Chuba Jamir, Dimapur

Clean Election, Ya NBCC aser ABAM-i kanga jempir anungji iba telok ana ya tamasa Clean sür ang, Clean Election indang jempi nung tajungba asütsü

-SMS

Clean electionji kari danga angatetra jembiang. Saka asen Naga lima nung makoktsü. Aoer-i BJP anema ken tajung mejemer aten saka Ao lima nung BJP nung aiba ajak adok. Naga nunger sen nung mejembutsü. Yamaji clean election adongbaji (mim sen) süpokrem bushirdang. Taji mejembi tajungba. - Ben Ao Clean election indang mejembi tajungba kechiaser tejen yimya sübaba küm ka nung indoktsü tasak. Local Area Developdnt fund küm shia senpak crorer kaka aruba malem ayuba den küm 5 public malem ayuba alemtsüba yongyaa atar nüber jendi lirji odang tokjang.

-SMS

Clean electionji danga district nung agiaka asen Ao lima nungbo malibasa tajungba asütsü kechiba süra asen Ao lima nungbo clean election ayonger temji tama süpokrem akgir, anungji ao limai atakatem marodaktsünüra Ao lima nungbo clean electionji magi tajungba asütsü.

-Bw

Clean election indang mejempi nung aser meinyak nung koma süla ta asüba nungji kechiba mejempitsü jempitsüla aser inyaksüla. Tang tendak inyakerembo menütsütsü aser masütsüla ta ashitsü saka tang tanur alirtem küm 12 nungi 30 tsüngda alirtem dang kanga nendaka ashitsüla aser seminar ama agütsüra par tendakbo Clean electionji mapa akümtsü aser asen lima Election Cancer tashidakji aneptsü ta bilemer.

-Lidenlar.

AO OSHI ANGAZÜKDAK:

TANÜ ANGAZÜKTSÜBA OJANG



Letset

(v) tzü tatsük agi yirua asüba (kill by hot water)

* Koya longki nung tzü tatsük agi **letset**.

Letzük

(v) tzü mesüra yin tatsük agi yiruba (scald)

* Tzü tatsük agi Asangla teka mejungi **letzük**.

TANÜBO NAI LANGZÜANG

Q. Koba linüki wheat ton 50,000 aser mozü belentsü asoshi Pakistan-i India dang mela.

[A] Turkmenistan [B] Iran [C] Afghanistan [D] Tajikistan

—————(Taruba adok nung onoki langzüksü)

YASHI ADOK TELANGZÜBA: PP Chaudhary

NAI-A YA METETTER MA

1895 küm November 28 nü, "Chicago Times-Herald" ajanga Chicago nungi Evanston - Evanston nungi Chicago (mile 55 - km 88.514) tashi America indang mezüngbuba auto race ayongzük. Iba race nung gari trok toktepa liasü, kong Frank Duryea-i iba race (7mph/11.26 kmph tashi kara anitet) takok angu. Iba race nung Frank Duryea-i aniba Duryea Motor Wagon Company indang gari noksa nung angur.



SUDOKU # 6051

TELANGZÜBA # 6050

7		3	9	8			5	1	6	1	5	7	9	4	3	8	2	
				1	7		3	8	6	8	3	2	1	5	6	7	9	4
8	1				3	7	2	9	7	4	9	8	3	2	1	6	5	
		2	4	3	6	8			1	8	6	5	4	3	2	7	9	
6	4	5							5	2	7	9	1	8	4	3	6	
9				5				7	3	9	4	6	2	7	5	1	8	
2	9	7				5			4	5	8	3	6	1	9	2	7	
4			7		9			8	9	7	3	2	8	5	6	4	1	
		1	6	4		9			2	6	1	4	7	9	8	5	3	

OJANG LUTEP # 5607

NGSÜAATYOA :

SÜMA :

KASA :

MULUTENG :

RÜTEMEK :

GIA :

ÜNGTSREM :

MNE :

ENTLA :

ÜJAAGNG :

OJANG LUTEP TELANGZÜBA # 5596

TANÜ ATEMA DANG MESÜI TARÜTSÜ TAJUNGBA ASOSHI SHISADANGA INYAKTSÜ MERANGANG

TAN HOPTA ATEMA - KOMA SÜLA ?

Q. Kohima nung Hornbill benjong amongtsü atema Kisama yim akümba ama, Mokokchung district nunga yim ajunga adenshia sobaliba benjong amongdak yim tasen ka mesemtet nunga koma süla ?



November 27, 2021 nü New Delhi nung 12buba Indian Organ Donation Day amongdang Health & Family Welfare Union Minister, Mansukh Mandaviya-i Best State for Organ & Tissue Transplant Organization (SOTTO) sempet Maharashtra nem agütsüba noksa nung angur. Noksa nung Union Minister of State for Health & Family Welfare, Bharati Pravin Pawar-a angur.

Minister Tomar-i aluyimertem dang kidangi meyipa aotsü mepishi

New Delhi, November 27 (Agencies): Honibarnü Agriculture Minister, Narendra Singh Tomar-i longkak aiter aluyimertem dang pei kidangi meyipa aotsü mepishiba den külemi pai, 'aluyimertem anema benoka aliba ken otem agientsü aser aluyimertem asüba atema senotsü teyari agütsütsüji state tem mapa lir' ta metetdaksü.

Parliament senden tenzükba anogo, November 29 nü aluyimertemi tractor nung longkak aita Parliament tashi aotsü sentong liasü saka thinenogo.

Union Minister-i aluyimertem dang, nenoki akhangba ama sorkari ataloktsüogo, anungji nenok pei kidangi meyipa aotsüla, ta ashi.

Osangbener den jembidang pai, "Longkak aiter aluyimertem anema benoka aliba ken otem agientsü aser longkak aitba mapang asür aluyimertem kibongtem nem senotsü teyari

agütsütsüji state sorkartem mapa lir," ta metetdaksü.

Ano aluyimertem organization balalai alu nung jana arongba ya ozüing alema inyakba mapa ka masütsü atema akhangba onük-a sorkari agizükogo, ta pai ashi.

"Zero-budget farming aser MSP inyakyim kanga teladak akümsü atema Ato kilonseri committee ka tentetsü ta sangdongogo. Iba committee nungji aluyimertem organization balala nungia züngsemtem anioktsü. Iba committee tentetba ajanga aluyimertemi MSP akhangba ataloktsür," ta pai ashi.

"Aluyimba dak sendakba ozüing asemprong agientsü ta sangdongogo, anungji aluyimertemi maneni longkak aittsü menüingdak. Ni aluyimertem dang longkak aitba anener pei kidangi meyipa aotsü mepishir," ta pai metetdaksü.

Aluyimba dak sendakba ozüing asemprong agientsü

atema Parliament nung Farm Laws Repeal Bill, 2021 benoktsü. Sorkari Parliament nung Bill tasen 26 benoktsü tebilemba lir, aser item bill rongnung iba bill densema lir.

Ajisüaka Bharatiya Kisan Union (BKU) lenir, Rakesh Tikait-i, sorkari Minimum Support Price (MSP) atema ozüing ka yangluba sülen ang aluyimertem pei kidangi meyipa aotsü, ta metetdaksüogo. Tikait-i, "Sorkari onoki akhangba ama Minimum Support Price (MSP) atema ozüing ka yangluba sülen ang onoki longkak aitba anener pei kidangi aotsü. Onoki January 26 (Republic Day) tashi Delhi arrtsülen alitsü tebilemba mali. Sorkari onoki akhangba ama MSP agütsüba den külemi longkak aitba mapang asür aluyimer 750 kibongtem nem senotsü teyari agütsüra onok kidangi meyipa aotsü," ta metetdakja liasü.

Sangküm May-June nung J&K assembly elections agitsüa akok

Srinagar, Yimpoksüi/ November 27 (Agencies): Sangküm May-June nung Jammu & Kashmir nung assembly elections agitsüa akok, ibayongji Jammu & Kashmir nung yimtenren party balalai election dak sendakba maparen tenzükogo.

Osang angazükba agi, delimitation commission-i J&K nung draft report renemogo. Iba commission nung tongtiji retired Supreme Court judge, Ranjana Desai lir.

"Draft report renemogo anungji iba report ji Lok Sabha nung züngsem asem- National Conference (Farooq Abdullah, Hasnain Masoodi aser Akbar Lone) aser BJP nungi Jitendra Singh aser Jugal Kishore Sharma nunger densema associate members den lemsatepatsü, " ta osang ka ajanga metetdaksü.

Iba osang prokba sülen state nung National Conference (NC), PDP, BJP, Congress, J&K National Panthers Party

(JKNPP), J&K Apni Party aser Peoples Conference (PC) party temi election dak sendakba senden balala ayongzüka agidar.

Delimitation sülen J&K assembly nung menden 90 shi alitsü. Kashmir Valley nung menden 47 aser Jammu region nung menden 36 liasü saka delimitation sülen Jammu region nung menden 6 agütsüsemtsü aser Kashmir nunga menden ana tali agütsüsemtsüa akok.



November 27, 2021 nü Kolkata nung aliba SSKM hospital nung West Bengal sorkar hospital balala nungi nurse temi longkak aitba noksa nung angur. Itasen bendangshidanga agütsüba aser menüingdakba nung transfer yokba anema parnoki longkak ait.

RIM-i Afghanistan dang sorkar nung ajak züngoktsü mepishir

New Delhi, November 27 (Agencies): Tang India aser China na tsüingda tensa mejungi aliba ajanga Russia, India aser China (RIM) senden nung imlaba ama telemtetba junga magitet, ta osang ka ajanga metetdaksü.

Hokolbarnü India foreign minister, Subrahmanyam Jaishankar mendenbuba ser video conferencing ajanga RIC senden mena liasü. Iba senden nung Russia Foreign Minister, Sergey Lavrov aser China Foreign Minister, Wang Yi nata aden.

RIN senden nung regional aser international onük kar dang jembi aser Afghanistan tensa atema-a jembiogo.

Okila tenzükba Jaishankar-i, "Kidanger ka aser mapang talangka nungi partner linük ka ama India-i Afghanistan tensa atema tebilemstü katsür, talisa Afghan nungertem timtemba atema tebilemstü akar. Afghanistan nung ajak züngokba sorkar ka alitsüla aser UN Security Council Resolution 2593 nung aliba

ama inyaktsüla ta India-i bilemer. Afghan nunger atema bilemja tsüngsarusa aliba nung ajemdaker onoki Afghanistan nem wheat 50,000 MT agütsütsü asüingdangogo," ta metetdaksü.

Paisa, Afghanistan nem teyari agütsütsü atema RIC linüktemi longjemer inyaktsüla, aser iba maparen nungji tetsükdaksü malitsüla, ta ashi.

Senden tembangba sülen RIC linüktemi sangdong ka ajanga Taliban telok dang Afghanistan nung lisopur telok balala aser yimtenren telok balala ajak nungi züngsemtem sorkar nung dendaktsütsüla, ta tayongzüka agütsü.

RIC-isa Taliban dang Afghan nunger li nungi kiralongrar telok balala memelatsü metetdaksü.

Iba dak alia RIC-i Afghanistan nung UN-i tongti shilem agitsü ayongzüka.

RIC-i Myanmar linük nunga telok ajak dang rara anentsü ajungshiba den iba linük nung tesünep alitsü ayongzüka.



November 27, 2021 nü Jammu nung Jammu & Kashmir Congress Tir, Ghulam Ahmad Mir-i osangbenertem den jembiba noksa nung angur.

'Omicron' putetba linüktem nungi tayimtsü nokdangtsüla: Kejriwal

New Delhi, November 27 (Agencies): Tang alima nung coronavirus variant 'Omicron' puteta prokba dak sendakba nung Honibarnü Delhi Chief Minister, Arvind Kejriwal-i Ato kilonser, Narendra Modi dang coronavirus variant tasenba putetba linüktem nungi tayimtsü aruba nokdangtsüla, ta takhangba agütsü.

Kejriwal-i twitter ajanga, "Coronavirus variant tasenba putetba linüktem nungi aruba tayimtsütem nokdangtsü atema ni Ato kilonser dang mepishir. Corona wara nungi kanga saaka asen linük shia arutetogo. Iba variant tasenba ya India telungi maitdaksütsü atema asenoki akokba ajak inyaktsüla," ta metetdaksü.

Coronavirus variant tasenba nokdangtsü atema November 29 nü Delhi sorkari Disaster Management Authority

(DDMA) senden ayongzüka agitsü.

"Africa nung aliba linüktem nung COVID variant tasen putetba nung ajemdaker onoki DDMA dang Honibarnü report agütsütsü aser tebilemba onüktem lemsateptsü tuyuogo. Na aser ner kibong kümzüksü atema onoki akokba tashi mera ajak agia inyaktsü," ta pai metetdaksü.

Ano külen Honibarnü Ato kilonser, Narendra Modi-i ketdangsertem den senden mena coronavirus tensa aser vaccination dak sendakba nung o lemtepogo.

Iba senden nung adener tongti ketdangsertem rongnung Cabinet Secretary Gauba, Principal Secretary to PM, PK Mishra, NITI Aayog member (health) Dr VK Paul aser Union Health Secretary, Rajesh Bhushan nunger densema liasü.



Joquicingo, November 27: November 26 nü Joquicingo, Mexico nung bus ka tsükokba tesem nung nüburtem adenshir aliba noksa nung angur. Hokolbarnü iba bus indang brake mapa minyakki küma ki ka nung oa atsükba sülen nisung 19 asü aser nisung 25 shi yirua liasü, ta local ketdangsür kati ashi.

Canada, Sri Lanka & Thailand-i Africa linüktem nem tenokdangba agütsü

Montreal, Yimpoksüi/ November 27 (Agencies): Covid-19 Omicron variant poktetba sülen Canada sorkari Africa linük tenet nungi Canada nung masür shirnok taoba anogo 14 tsüingda item linüktem semdangogo, parnok linüki maitdaksütsü telemtetba agiogo.

World Health Organization-i tashidak tapu tasenba ya tebilemtsüka lir ta sangdongba sülen iba inyakyim ya January 31, 2022 tashi benoka inyaksangshitsü sangdongogo. Tang tashi nungbo Canada nung iba tashidak keta alir ka danga puteta mali.

Canada nung tang tashidak kanga kera menatepa aoba mapang ka nung iba jenjang ya agiogo. November 18 nungi 25 tsüingda anogoshia tashidak menaba jenjang shilem 9 agi timba küma anogoshia nisung 2,608 dak tashidak potetogo. Canada nung Hokolbarnü nisung 3,055 dak tashidak poteta tang tashi nung nisung 1,782,171 dak tashidak poteta lir aser tashidak agi nisung 29,618 süogo.

Tenokdangba agütsür aliba linüktem rongnung South Africa, Eswatini, Lesotho, Botswana, Zimbabwe, Mozambique, aser Namibia densema lir. "Bendangertem shirnok taoba anogo 14 tsüingda item linüktem semdangogo, parnok Canada-i arutsü memelatsü," ta health ministry sangdong ka ajanga metetdaksü.

Canada nung aser Canada nung telidakpurtem linüki

meypa arutsü melatsü, saka kasa sangdong ajanga parnok dak tashidak tendangtsü metetdaksüogo.

Senzüsenpongertem arishi kum 12 temapur, vaccine agir ali malir ajak hopta tatemi item linüktem nungi Sri Lanka-i arurtem ajak dak PCR tests asütsü.

Sri Lanka ajunga hopta trok mokdanga aliba October 1 nü lapoktsüba sülen anogoshia nisung 700 tema dak Covid tashidak poteta arudar. Honibarnü tashi nung iba linük nung nisung 561,059 dak tashidak potetogo aser nisung 14,258 züogo.

Maneni Thailand-ia Honibarnü Africa linük ti nungi senzüsenpongertem nem tenokdangba agütsüogo. December ita nungi tenzüka Botswana, Eswatini, Lesotho, Malawi, Mozambique, Namibia, South Africa aser Zimbabwe nungi senzüsenpongertem Thailand-i arutsü memelatsü, ta health official Opas K a r n k a w i n p o n g - i osangbenertem den sensaksema mapang ashi.

Thailand-i, item linüktem nungi arutsü atema sentong yanglur alirtem nem Honibarnü nungi tenzüka tenokdangba agütsütsü, ta paisa metetdaksü. B 1.1.529 variant pokteta Asia linük balalai jenjang tapet agitepba mapang Thailand nunga iba osang sangdongogo. World Health Organization-i iba tashidak tapu tasenba dak shisabulutsü keta lir aser tanga dang nungi takaratiba menatepa aotsü akok ta shiogo.

Taoba anogo 14 tsüingda Africa, Botswana, Lesotho, Namibia, Zimbabwe aser Eswatini (Swaziland) nung senzüsenpongertem Sri Lanka nung anenzüktsü memelatsü, ta

Afghan nunger tanur million 4 dak tema school-i maoer

Kabul, Yimpoksüi/ November 27 (Agencies): Afghanistan nung tanur million 4 dak tema school-i maoer, aser parnok rongnung tesadang dak tali tetsürtem lir, ta United Nations Children's Fund (Unicef)-i metetdaksü.

Unicef-isa, parnoki taoba ita asem tsüingda Afghan nunger tanur 142,700 dak tema nem kaketshisatsü agütsütsü atema teyari agütsüogo, ta ashi.

"Taoba ita asem tsüingda Unicef-i community-based education class 5,350 nem teyari agütsüogo aser iba ajanga Afghanistan nung tanur 142,700 dak tema nem kaketshisatsü angazüktsü maongka agütsüogo. Ajisüaka tanur million 4 dak tema school-i moi lir aser parnok rongnung tesadang dak tali tetsürtem lir," ta Unicef-i tweet asü.

Turkey nung amendaker aliba NGO kati ashiba agi, parnoki Afghanistan kübok Afghan-Turk school tem nung azüingsü jangraba kaketshirtem atema entrance tatidang ayongzüka agiogo, ta TOLO news sangdong ka ajanga

metetdaksü. Entrance tatidang agütsüba kaketshir 3500 rongnungi tatidang ajangeter 1000 dang Afghan-Turk school tem nung züingtettsü.

"Administrative aser educational department nung Turkey nunger 1,000 dak tema dang Afghanistan nung inyakdar. Afghanistan nem teyari agütsütsü onok bendanga agütsür lir," ta Afghanistan nung Maarif Foundation tekolakba Saleh Mohammad Saghir-i ashi.

Afghanistan education ministry-ia, tanurtem nem kaketshisatsü bushitsü atema maongka agütsüba atema kanga pelaba lemsatepogo.

Kasa mapang nung yaküm dang nungi taküm tatidang agütsür tajemba kümogo, ta Afghan-Turk school tem nung tesayur aser examiner temi ashi.

"Taoba küm tatidang agütsür aika liasü," ta tesayur Omid Sapai-i ashi.

"Tawa linük nung temelenshi adokba ajanga kaketshirtem enrollment nung kongshiogo," ta tesayur Abdul Baqi Oriakhail-i ashi.



Minsk, November 27: Belarus tir Alexander Lukashenko-i (tachichi) Belarus-Poland arrtsü nung Bruzgi checkpoint anasa refugee tem den sensak asema noksa nung angur.

Kyrgyzstan nung coup asütsü tasa asar 15 apu

Bishkek, Yimpoksüi/ November 27 (Agencies): Kyrgyzstan nung Security services-i Hokolbarnü ashiba agi, parliamentary election magi tsüingda ozüing yanglurtem aser taoba mapang sorkar ketdangsürtem densema 'coup' asütsü tasa asar nisung 15 puogo.

Hokolbarnü pua alirtem ya, vote agütsüba result sangdongba sülen iba anema longkak aittsü atema lanur 1000 anidentsü asoshi sentong yanglur aliba nung shilem agirtem lir, ta state committee for national security-i sangdong ka ajanga metetdaksü.

"Taruba parliamentary elections result sangdongba sülen, iba telok yagi linük yimtiba Bishkek nung longkak aitba sentong ayongzüka tensa mejungi kümdaksütsü aser temzüng ozüing azüokertem den mangatettep adoka tashiyim agi sorkar atsüingsü sentong yanglur liasü," ta kasa sangdong ajanga metetdaksü.

Security services-i, parliament nung deputy tem aser taoba sorkar ketdangsürtem densema yimden yimsüsüba tsütsü teraksatsüba

bener arutsü atema tentetba telok ka ket nungi ozüing alema inyaksangshitsü atema tasa asaba kuli tejangja ngutetogo.

Osang tejangja magütsüi, committee-isa parnoki iba telok indang office ka meita aoba mapang prangbong, injang aser temesepba mozü puogo ta ashi.

Kyrgyzstan ya Central Asia nung sensaker linük ka lir, kong 1991 küm Soviet Union nungi nüjiso anguba sülen tir asem tashi atsüngtokogo. Iba linük nung yimden yimsüsüba tsütsü mepetmesü adokyonga aruba nungi jenbotsü atema timla nung taruba election atema inyaktepdar. Mapetmesü teyalong nung taoba küm tang aliba lenir Sadyr Japarov ya linük len anitsü atema shim.


Taoba küm tepuokdak nungi tir mendeni atuba sülen Japarov-i, free aser fair election ayongzüka agitsü tenangzüka agüja liasü.

Ajisüaka electoral ketdangsürtemi candidate ka magizük aser ka dang senchi chiogo. Tenaprongla ya tang melentsü aliba parliament nung pei tebilemba tasü ita jembirtem ama züingshir.



Los Angeles, November 27: Los Angeles, California nung Black Friday shoppers tem Citadel Outlets nung shishilembaba noksa nung angur.

Ranveer indang '83' December 24 nü sayatsü



ama shilem agiba angutsü. 1983 World Cup asayamung nung captain ama Kapil-i anir team asayaogo. Taoba küm (2020) April 10 nü theatre nung iba film sayatsü sentong renem, saka linük nung Covid-19 tensa kanga mejungi akümba ajanga thinena liasü.

Tang, '83' film ya Khristmas atongtsü anogo ka lia December 24, 2021 nü sayatsü terenemba lir.

November 30, 2021 nü film yanglurtemi '83' indang teaser sayatsü.

Social media sabang nung, Ranveer Singh-i iba film teaser den olen ka lemsatepa liasü.

" 24TH DEC, 2021 nü CINEMA nung 83 film Hindi, Tamil, Telugu, Kannada aser Malayalam oshi nung sayatsü. Aji masüadang film indang teaser ka sayaogo. November 30 nü film indang trailer sayatsü. #ThisIs83," ta pai lemsatep.

Star balalai shilem agiba film ya sen jenti indoka yangluba

project ka asütsü. April 2020 nungi anogo atsülanga arur sülen iba film sayatsü renemdar.

Kabir Khan-i direct asüba film nung Deepika Padukone, Saqib Saleem, Hardy Sandhu, Tahir Raj Bhasin, Jiva, Ammy Virk, Pankaj Tripathi aser Jatin Sarna nungeri tongti shilem agiba angutsü.

'83' film yanglutsü asoshi mezüngbo taoba India captain Kapil Dev-i memulungi liasü.

Deepika Padukone aser Ranveer Singh nati iba otsü yanglutsü ta angashidang ni tsüba liasü, ta Kapil-i ashi.

Kabir Khan Films Production indang film - 83 ya Reliance Entertainment aser Phantom Films ajanga sayatsü.


Maneni, iba film Tamil aser Telugu version nung sayatsü asoshi Kamal Haasan indang Raajkamal Films International aser Akkineni Nagarjuna indang Annapurna Studios temi Reliance Entertainment longjemogo.

New Delhi, Yimpoksüi/ November 27, 2021 (Agencies): Ranveer Singh aser Deepika Padukone na indang kanga dang yongya ataba film - '83' sayatsü lia, Hokolbarnü iba film indang teaser ka sayaogo.

Kabir Khan-i direct asüba film ya 1983 küm otsüsüsüsa India-i Cricket World Cup takok anguba otsü ka asütsü.

Iba film nung Ranveer-i nüngtugu cricketer Kapil Dev

'GGPNL 2021' atema takok angur sangdongogo



Kohima, Yimpoksüi/ November 27, 2021 (TYO): Kohima Educational Trust indang Kohima Educational Society (KES), Nagaland-i 2021 küm 2021 atema 'Gordon Graham Prize for Naga Literature' takok angur tenüngtem sangdonger, ta Kohima Educational Society, Chairman Dr.P.Ngully aser President, Charles Chasie nati sangdong ka ajanga metetdaksü.

Taküm (2021) Fiction Category atema "Waiting for the Dust to Settle" kaket zülusang Veio Pou nem award agütsütsü.

Non-Fiction Category atema Wangto Chingmak nem award agütsütsü. Wangto-i "The Chang Nagas - In memory of our undefeated ancestors" kaket zülü.

Gordon Graham Prize Naga Literature 2021 atema entry indang kaket ajak international sabang nung nüngtugu publisher, KES aser KES nungi teshimtet nübu densema UK aser India nungi international jurist indang

team kati zünga liasü. Iba sülen entry 10 indang shortlist shimtet aser August ita sangdong.

Takok angurtem shimtsü asoshi, scholar aser writer - züngsem asem panel - Professor A.N.S Ahmed, Professor Vikas Kumar aser Dr. Easterine Kire nungeri tendanga telemtetba agütsü.

Gordon Graham indang nükjidong - 'Kaket tajung züluba maparen ajungkettsütsü aser Naga nunger kaket zülurtem tebilemba ajungkettsütsü', nung ajemdaker telemtetba (award angutsüpur tem) agia liasü.

Naga nunger rongnung tasa tajung agütsürtem aser akhi tejen otsü metetta/rajema alirtem jangjatetsü aser parnok nem sempet agütsütsü nükjidong nung iba naroküm agütsür.

Iba den külemi Naga nunger tsüngda azüngtsü, zülutsü aser tangar den yimji-yimjung aser tesendaktep tajung yanglutsü ajungmesotsü asoshi iba award agütsütsü lemtet.

British 2nd Division nungi taküm alir veteran tem, shirnoki

"Battle of Kohima" nung raraogo, parnoki 2004 küm Kohima Educational Trust (KET) tentet. KET ya UK nung 'charitable educational trust' ka lir. 1944 küm Kohima Tongbangrara mapang British den longjemer rarar Naga nunger dak nungi jakzükerkem kaket shisatsü bushiba nung nungitta yaritsü nükjidong nung iba Trust tentet.

Iba tasa ya Gordon Graham-i atongtet. Captain ka ama "Battle of Kohima" nung pai raraogo. Gordon-i Naga Literature ajungkettsütsü kanga janra liasü aser 'Gordon Graham Prize' ya tenzük. Taküm 3buba Literature Prize ya 'fiction' aser 'non-fiction' category ana nung agütsütsü renema lir.

2021 atema 'Gordon Graham Prize for Naga Literature' award sentong ya November 30, 2021 nü agitsü. Iba sentong agiba mapang, takok angur ana nem award agütsütsü, ta kasa sangdong nung shia lir.

TEPELA TASOBA ANOGO

28th Nov 1936 - 28th Nov 2021



Temeim obala **Mr. Nüngkümtemsü Imsong** Tsüngremi küm tir pungo tashi anema arishia yutsüba tenüngsang agütsür. Ozü akümdong asoshi maneni Tsüngremi obala arishi aser taküm tajung mojangma.

- Temeim kinungtsü, chirnur aser semchirtem.

LKM-i Meyionen nem tenüngsang agütsür

Dimapur, Yimpoksüi/ November 27, 2021 (TYO):

Langpangkong tzükong akhümtong Wb. Meyionen, IGP & Director (Retd), GoN-i Chief Information Commissioner Kaketshir Mungdang ajanga pelaba den tematiba tenüngsang asen lenir nem agütsür, ta LKM, President, Washimong Sadem Longkumer aser General Secretary, Temjentoshi nati

sangdong ka ajanga metetdaksü. Langpangkong nunger ajak alima tsüngdang tejak tentetsüsa, Wb. Meyionen IGP & Director (Retd)-i terak maket ochishia litetba atema GoN-i iba menden pa nem agütsüogo ta nümatanga bilemer.

Pa lenisüba nung asen lima dangi terenlok aser temelenshi arutsü LKM mendenti tamang sarasadem, ta kasa sangdong nung metetdaksüogo.

Halsey nem 'Innovation Award' agütsütsü

Yimpoksüi/November 27, 2021 (Agencies): Sangküm, 'BandLab NME Awards 2022' sentong nung Halsey nem Innovation Award agütsütsü.

Iba rock 'n' roll music awards sentong ya sangküm agitsü terenemba lir aser 'Without Me' ken atenla Halsey (Ashley Nicolette Frangipane) nem iba naroküm agütsütsü. Taoba sentong nung 'The 1975, Bring Me The Horizon aser Boy Better Know nungeri iba award agizüka lir.


March 02, 2022 nü London indang O2 Academy Brixton

nung iba sentong ayongzüksü. Iba award sentong nung artist talisa Sam Fender, Griff aser Rina Sawayama nungeri shilem agitsü.

Arishi küm 31 tain Rina-i, "Sangküm BandLab NME Awards sentong nung shilem agitsü asoshi yongyaseter. Iba sentong nung shilem agitsü maongka agütsüba ya khonang ama lir aser tebang agi rasa meshitetsüsa kanga yongyar," ta ashi.

Iba award sentong atema nominee aser sabang nung shilem agitsüpur tenüngtem mapang tongi sangdongtsü.

Sidharth-i 'Yodha' tangok tenzükogo



Mumbai, Yimpoksüi/ November 27, 2021 (Agencies): Sidharth Malhotra-i Hokolbarnü 'Yodha' atema tangok tenzükogo. Nüngtugu film yanglur Karan Johar-i 'Yodha' film produce asütsü.

Sidharth indang project tasenba ya sangküm (2022) November 11 nü sayatsü sentong lir. Iba production label (Karan Johar) atema Yodha ya mezüng action franchise ka asütsü.

Tawa sayaba 'Shershaah' film nung Sidharth-i Kiara Advani den külemi shilem agiba nguogo. Iba film dak sendakba nung

telangzüba tajung aika nguogo. Linük aser Territory 210 dak tema nung Shershaah sayaogo.

Instagram Story nung Sidharth-i project tasen indang osang lemsatep. Pai set nung tangokba noksatem lemsatepa liasü.

Karan Johar indang Dharma Productions ajanga nungitta yanglutsü aliba 'Yodha' project ya 'aerial action film' ka asütsü.

Dharma Productions-ia Instagram sabang nung Sidharth-i Yodha' tangok tenzükba osang den noksa balala lemsatepa liasü. Iba project ya Pushkar Ojha aser Sagar Ambre nati direct asütsü.

AKTD Penalty Shootout benjongmung agiogo



Ao Kaketshir Telongjem Dimapur ajanga DDSC stadium, Dimapur nung November 27, 2021 nü Open Penalty Shootout Festival ayongzükba nung takok angur, Changtongya Kaketshir Telongjem Dimapur nungi asayartem tangokba noksa ka yangi angur.

Dimapur, Yimpoksüi/Nov. 27 (TYO): Ao Kaketshir Telongjem Dimapur ajanga November 27, 2021 anogo Open Penalty Shootout Festival 2021 sentong ka Dimapur District Sports Council indang stadium nung agia liasü. Iba sentong

nung tongti tesemdanger, Minister, Higher Education & Tribal Affairs, Government of Nahaland, Temjen Imna Along Longkumer liasü asee team 58-i shilem agia liasü.

Iba asayamung nung tematiba jenjang nguteter nem senpet sen 70,000, tanabuba jenjang nguteter nem senpet sen 40,000 aser semifinal tongteter team nem senpet sen 15,000 aser Golden Glove atema senpet sen 10,000 agüja liasü.

Iba asayamung nung mezüng jenjang Changtongya Kaketshir Telongjem Dimapur, tanabuba jenjang Hwarong Strikers aser Golden Glove senpet Changtongya Kaketshir Telongjem Dimapur nungi Sp. Along-i ngua liasü.

Indonesia Open: Sindhu semifinal nung tsükogo

Bali, Yimpoksüi/November 27, 2021 (Agencies): Honibarnü, Indonesia Open asayamung tetsür kija semi final asaya nung India tsür P V Sindhu tsükogo.

Iba asayamung semifinal nung Sindhu-i taoba mapang world champion Thailand tsür Ratchanok Intanon makok.

Olympic asayamung balala

nung anaben medal angur Sindhu-i iba asayamung semifinal tasembuba nung shilem agia liasü, kong World no. 8 aser seed tanabuba Ratchanok-i 21-15 9-21 14-21 agi Sindhu madak takok angu.

Arishi küm 26 tain Sindhu-i taoba hopta Indonesia Masters aser October ita French Open asayamung anaprongla nung

semifinal tongteta asayaogo.

Super 1000 asayamung tebur tarep semifinal nung, World no. 11 aser seed trokbuba India nung tarep Satwiksairaj Rankireddy aser Chirag Shetty na tsükogo. Satwik aser Chirag nati 16-21 18-21 agi Indonesia nung top seed Marcus Fernaldi Gideon aser Kevin Sanjaya Sukamuljo makok.

Saurav Ghosal-i Malaysian Open title kokogo

Kuala Lumpur, Yimpoksüi/November 27, 2021 (Agencies): Honibarnü, SRAM 40buba Malaysian Open Championships tebur kija Squash final asaya nung, Saurav Ghosal-i Miguel Rodriguez madak takok anguba sülen, otsüsüsüsa Malaysian Open Championships

title takok angur India nung rongnung pa mezüng kümogo.

Iba final asaya nung, seed tanabuba Ghosal-i 11-7, 11-8 aser 13-11 agi Colombia nung top seed Rodriguez tsükdaksü. Iba asaya minute 55 nung tembang.

"Iba title takok anguba atema

pelar. Asayamung tenzüker külen nungi final tashi asayar tajung balala den toktepa asayaogo," ta game ka nung danga tamakok mengui asayasang Ghosal-i ashi.

2018 Kolkata International Open asayamung nung Ghosal-i PSA title takok ngua lir.

Khrietsonyü Whuorie-i Tsütuononomia Wrestling Heat kokogo

Kohima, Yimpoksüi/November 27, 2021 (TYO): Honibarnü, Tsütuononomia Wrestling Heat cum Open Under-16 asayamung nung Khrietsonyü Whuorie aser Kevisazolie Solo (Under-16) nati takok nguogo, ta sangdong ajanga metetdaksü.

T Khel Indoor Stadium, Pherazou Kohima Village nung Tsütuononomia Youth Orgaisation ajanga iba Wrestling Heat ayongzükba liasü.

Iba Wrestling Heat' final bout

nung Khrietsonyü Whuorie-i Vizakietuo Suohu madak takok angu. Kasa tetoktepa nung Khriebazo Solo aser Kevichütuo Solo nati tasembuba aser pezübuba jenjang ajangzükdet.

Takok angur pezüprongla nem senpet 30000, 20000, 15000 aser 10000 agütsüogo.

Under-16 Wrestling Heat' final bout nung Kevisazolie Solo-i Neiphrekhotuo Belho madak takok angu. Kasa tetoktepa nung Seyiezekou Solo,

Rüdilhoulie Belho aser Medovituo Whuorie nungeri tasembuba, pezübuba aser pungobuba jenjang nung takok nguogo.

Temaba jenjang pungo nung takok angur nem senpet 10000, 7000, 5000, 3000 aser 2000 agütsüogo.

Maneni, group champion ama Group A-i takok angu aser iba group nem senpet 5000 agütsü, ta kasa sangdong nung shia lir.



Run Mokochung tenzüker küm 5 ajungba tenüng nung tenüngsang agütsüba sentong tongmelang ka Impur nung akadang ABAM Executive Secretary Rev. Dr. Mar Pongen densema par külem tenzükerterem aser MTBA Assoc. Pastor Rev. Temsüwati-i anir Run Mokochung züngsemtem külemi tangokba noksa nung angur. Run Mokochung ya Mokochung Town Baptist Arogo-i santem shimang aser tanela anema ayuba den kiyonger kidangertem den mission mapa inyaksü nükla yur tenzükba mapatong ka lir. Mokochung, 27th November, 2021

World Table Tennis Championships: Manika Batra quarter final tongogo

Houston, Yimpoksüi/November 27, 2021 (Agencies): World Table Tennis Championships asayamung temeyoktep tarep aser tetsür tarep round of 16 asaya anaprongla nung Manika Batra-i takok anguba sülen, quarter final tongogo.

Hokolbarnü, Houston nung tetsür tarep round of 16 nung India tsür Manika aser Archana Kamath nati Hungary tsür Dora Madarasz aser Georgina Pota madak 11-4 11-9 6-11 11-7 agi takok angu.

Semi final tongtetsü atema Manika aser Archana nati Luxembourg tsür Sarah de Nutte aser Xia Lian Ni den quarter final asayatsü.

Iba asayamung semi final nung takok angurtem nem bronze medal agütsütsü renema lir.

Kasa asayamung temeyoktep tarep nung, Manika aser külem India nung G Sathiyani nati kanga dang meranga USA-China temeyoktep tarep Kanak Jha aser Wang Manyu na tsükdaksü. Iba asaya mezüng game ana tashi Manika aser Sathiyani nati makok, saka tenati tanüngba set asemprongla atonga takok ngua quarter final tongtetogo.

Manika aser Sathiyani nati 15-17 10-12 12-10 11-6 11-7 agi Kanak aser Wang tsükdaksü. Temeyoktep tarep quarter final nung tenati Japan nung Harimoto Tomokazu



Manika Batra

aser Hayata Hina den asayatsü.

"Iba asayamung tenzüker nungi tanü tashi jangratema asayadar. Iba den külemi tesüsa asayaba temeyoktep tarep nunga junga asaya liasü. Bilemba ama künapronglai (Manika) tasa balala amshia junga asayaogo. Taruba round nunga maneni takok nguyonga asayatsü bilemdar. Japan nung temeyoktep tarep (Harimoto Tomokazu aser Hayata Hina) den tokteptsü tasak asütsü, saka küna dak aketba sempet aser tasa tajungtuba amshia asayatsü," ta World no. 37 Sathiyani-i ashi.

Ajisüaka, iba asayamung temeyoktep tarep round of 16 asaya tanga ka nung India nung Sharath Kamal aser Archana nati France nung Jia Nan Yuan aser Emmanuel Lebesson makok.

Kohli-i Shreyas Iyer nem tenüngsang agütsü

Kanpur, Yimpoksüi/November 27, 2021 (Agencies): India cricket team atema Shreyas Iyer-i junga asaya arudar aser mezüng Test cricket nung 'century' yanglutetba atema Test captain Virat Kohli-i pa nem tenüngsang agütsü. Test 'debut' nung century yanglur Indian cricket asayar rongnung Iyer 16buba kümogo.

Tang, Kanpur nung New Zealand aser India tsüngda tasayadak aliba mezüng Test nung, Iyer-i ball 171 nung run 105 yanglutet.

"Kanga junga asayaogo aser mezüng Test cricket nung century yangluba atema @shreyas41 nem tenüngsang agütsür," ta Instagram nung Kohli-i lemsatet.

Arishi küm 26 tain Iyer-i run 75 nung asaya tenzük aser minute 45 tsüngda pai iba alizüng tongteta liasü. Wicket pungobuba nung pai Ravindra Jadeja den külemi run 122 yanglua liasü.

Mezüng Test nung century yanglutetter India nung cricket asayartemji - Lala Amarnath, Deepak Shodhan, AG Kripal Singh, Abbas Ali Baig, Hanumant Singh,

Gundappa Vishwanath, Surender Amarnath, Mohammad Azharuddin, Pravin Amre, Sourav Ganguly, Virender Sehwag, Suresh Raina, Shikhar Dhawan, Rohit Sharma aser Prithvi Shaw asütsü. Iyer-i mezüng Test nung century meyangludang, item asayar yagi mapang balala nung century (Test debut) yanglua liasü.

2018 Ranji Trophy season nung Mumbai team captain Iyer-i iba alizüng tongtetba osang angashia Sachin Tendulkar-ia pa nem tenüngsang agütsüogo.

"Test career junga tenzükogo @ShreyasIyer15. #TeamIndia nung junga asayaba ngua pelar. Tarutsü nunga tajungba asayatsü imlar," ta Twitter ajanga Tendulkar-i lemsatet.

Mezüng Test asayamung nung Rohit Sharma aser Prithvi Shaw nati century yangluba sülen Mumbai nungi Iyer ya asayar tasembuba asütsü.

Minute 267 tashi asayar sülen run 105 (ball 171) nung Iyer out süadok. Iba innings nung Iyer-i 4s' - 13 aser 6s - 2 züklokja liasü.

BILEMDANGANG
Tebang o dang nungibo yimya tajungi mapa tuluba inyaker."